

usaha Dewan Bahasa dan Pustaka yang telah berusaha sedapet-dapatnya menerbitkan buku-bukunya tetapi dibidas kerana belum cukup dengan tidak memikirkan kesulitan-kesulitan yang dihadapi.

Untuk bekerja dalam melaksanakan cita-cita untuk perbaikan dan kemajuan bangsa maka patut benar ingatan yang disebut oleh Tun Abdul Razak di dalam membuka seminar itu diikuti oleh masyarakat bahawa di dalam usaha-usaha bekerja hendaklah mengurangkan bercakap tetapi banyakkan bekerja dan berkhidmat.

* * *

Sukarno marah?

Keadaan Indonesia sekarang sangat mendukacitakan. Kesulitan-kesulitan hidup rakyat terutamanya di Pulau Jawa, tidak dapat disembunyikan lagi sehingga akhirnya gaji-gaji tentera terpaksa dipotong untuk bantuan kepada orang-orang yang menderita kelaparan. Pulau Jawa yang kecil yang berpenduduk 50 juta orang dan yang rapat benar penduduknya di Jawa Tengah sedang heboh dilanda kelaparan. Kesulitan-kesulitan hidup yang lain tidak dapat disebut tetapi kesulitan makanan tidak dapat dielakkan lagi iaitu hasil daripada kemerdekaan yang didapati oleh bangsa Indonesia.

Kalau perkara kesukaran hidup di Indonesia itu dahulunya hanya didengari daripada cerita-cerita mulut yang disampaikan oleh orang-orang yang datang kemari dan tidak dapat dibaca di dalam akhbar sebab akhbar di sana semuanya di-*sensor* maka sekarang perihal kelaparan itu tidak dapat disembunyikan lagi. Radio sendiri telah menyiarkan berita yang menyediakan itu.

Baharu-baharu ini pula seorang pemimpin yang baharu balik dari luar negeri dan telah singgah pula di Malaya,

tatkala tiba di Indonesia lalu membuat perbandingan perihal bagaimana jauhnya taraf hidup di antara Malaya dan Indonesia. Kenyataannya ini memarahkan bung Karno, lalu menyindir dengan menyatakan bahawa ada banyak perbezaan di antara kemerdekaan Indonesia dengan lainnya kerana kemerdekaan Indonesia dengan revolusi dan yang lainnya kemerdekaannya adalah sebagai hadiah sedang kemakmurannya bergantung kepada pertolongan kerajaan-kerajaan asing dan ketua polis serta ketua universitinya pun daripada orang asing.

Apa yang dikatakan oleh *President* Sukarno itu benar tetapi sungguhpun pegawai polisnya orang asing, dan ketua universiti orang asing tidaklah menjadi soal sebab khidmat-khidmat mereka adalah berfaedah kepada rakyat, mendidik dan memberi pengalaman-pengalaman bagaimana mentadbir negeri supaya aman dan damai, mendidik penuntut supaya berilmu dan menggunakan wang-wang bantuan dari luar berfaedah bukannya sahaja kepada kemakmuran negara tetapi juga kepada rakyat. Rakyat dapat terdidik untuk melaksanakan kerja-kerja negara supaya aman dan makmur, berbahagia dan seumpamanya sehingga kita tidak melihat wang-wang bantuan itu hanya diterima oleh satu golongan sedang satu golongan lain menderita - hidup segan mati tak mahu. Pemerintah-pemerintah terdiri dari mereka yang hanya tahu bercakap tetapi tidak tahu bekerja kerana mereka bukannya orang-orang yang berpengalaman boleh mentadbir negeri. Adakah lebih baik menggunakan orang-orang asing daripada orang-orang sendiri kalau negara akan runtuh?

Sebenarnya revolusi Indonesia peringkatnya yang pertama sudah selesai. Pemimpin-pemimpin Indonesia seperti Muhammad Hatta, Natsir, Sjahrir dan lain-lainnya menyedari akan buruknya perebutan-perebutan yang dilakukan oleh *President* Sukarno.

(Sambungan pada muka 41)

(Sambungan dari muka 6)

Semenjak dari tahun 1950 menghidupkan semangat perjuangan merebut Irian. Mereka bukannya tidak mahu merebut Irian tetapi mereka lebih dahulu menghendaki sampai negara diatur dan diperbaiki – pemerintahan ditadbir dengan jujur dan diselenggara untuk kemakmuran rakyat – bukan untuk beberapa golongan.

Bantuan-bantuan yang diterima oleh Indonesia dari luar negeri lebih banyak diterima oleh Indonesia daripada yang diterima oleh Malaya tetapi bantuan-bantuan itu ditadbir oleh orang-orang yang bukan ahli tadbir sehingga kekayaan Indonesia tidak dapat dirasa oleh rakyatnya sendiri. Timbulnya pemberontakan di daerah bukannya bersebab lain selain daripada adanya sifat monopoli pusat kepada hasil-hasil daerah.

Rakyat tidak dibenarkan lagi bersuara – pemimpin-pemimpin yang jujur yang tidak mahu mangampu *President* akhirnya dipekup¹ dan dipandang sebagai musuh negara dan berbahaya untuk keselamatan. Mereka dikurung dan pada riak ucapan-ucapan *President* yang akhirnya nampak sebagai suatu bayangan bahawa boleh jadi sebagai satu permulaan kempen untuk menangkap Dr Hatta yang hingga kini tidak berani disentuhnya kerana *President* mengetahui bahawa Hatta masih banyak mempunyai pengikut.

Alasan yang dibuat adalah kerana Hatta harus membuat perbandingan Indonesia dengan negeri-negeri jirannya seperti Malaya yang pemimpin dan penduduknya terus-menerus bekerjasama untuk mengadakan pembangunan secara jujur kepada cita-cita memimpin rakyat supaya hidup berbahagia dan makmur – tidak seperti di Indonesia, pakaian kurang dan serta mahal, beras mahal, gula mahal dan seterusnya tidak ada negeri di dalam dunia ini yang kita mendengar hari-hari rakyatnya

bukannya sahaja sudah memakan tikus tetapi berpuluh-puluh bahkan beratus-ratus telah mati kelaparan. Yang menyediakan sangat adalah keadaan kelaparan itu di dalam sebuah negara yang masyhur kaya dengan bahan mentah, bahan makanan!

Benar kata Tengku Abdul Rahman hanya negara yang berperintahan *Communist* sahaja yang mahukan anak negerinya sengsara supaya mereka tunduk, supaya jiwa mereka mati bersama-sama dengan jasmani mereka.

Sepatutnya *President* Sukarno menyedari bahawa gambaran hidup di negeri jirannya patut diteladani dan dipelajari supaya rakyatnya tidak kelaparan – tidak ia memusuhi dari satu ke satu masa.

Orang-orang di Tanah Melayu cukup mengetahui bahawa ucapan *President* membidas Malaya dengan sebegitu rupa adalah sebagai suatu perkara yang berhubung lama di antara Malaya dan Indonesia. Orang-orang di Tanah Melayu tahu bahawa tatkala Tengku mengundang Bung Karno ke Malaya, surat undangan itu tidak pun berjawab. Orang-orang Malaya masih ingat apabila Tengku membuat jasa baiknya sebagai orang tengah dalam soal Irian, Tengku dibidas – bukannya diberi terima kasih, dan sekarang Malaya disindir-sindir yang boleh difahamkan ia sebagai alat penjajah kerana masih menggunakan bangsa-bangsa yang menjajah untuk mentadbir negaranya. Apakah ini kita tidak pandang sebagai penghinaan?

Melihat kepada keadaan-keadaan itu maka rasanya mustahak sungguh Tengku Perdana Menteri memikirkan semula supaya lawatan Seri Paduka Yang di-Pertuan Agong ke Indonesia itu di undurkan kepada suatu masa sehingga orang-orang Indonesia menyedari bahawa Malaya sentiasa memberi jasa-jasa baiknya terhadap Indonesia bukannya sahaja sekarang tetapi dari dahulu lagi sehingga di dalam revolusi adanya.

¹ Perkataan sebenar ialah dicekup